



REPUBLIKA E KOSOVËS / REPUBLIKA KOSOVA

GJYKATA THEMELORE PRISHTINE

Numri i lëndës: 2019:112634

Datë: 27.10.2023

Numri i dokumentit: 04840122

P.nr.1764/19

NË EMËR TË POPULLIT

GJYKATA THEMELORE NË PRISHTINË-Departamenti i Përgjithshëm, gjyqtari i vetëm gjykues Dibran Jusufi, me bashkëpunëtoren profesionale Sadete Kuqi Berisha, në çështjen penale kundër të akuzuarit T.L. nga Prishtina, për shkak të veprës penale Rrezikimi i trafikut publik nga neni 378 par.8 lidhur me par.6 dhe par.1 të KPRK-së, me mbrojtësin e tij të caktuar sipas detyrës zyrtare avokatin Sh.U. nga Prishtina, duke vepruar sipas aktakuzës së Prokurorisë Themelore në Prishtinë-Departamenti i Përgjithshëm, me numër PP/II.nr.2308/2017, të datës 21.05.2019, pas mbajtjes së shqyrtimit fillestar me datë 20.10.2023, të hapur për publikun, në të cilën prezent ishin prokurori i shtetit Lulzim Aliu, i akuzuari T.L. me mbrojtësin e tij Av.Sh.U.si dhe i dëmtuari A.G. me datë 23.10.2023, morri dhe publikisht shpalli, ndërsa me datë 27.10.2023 me shkrim e përpiloi këtë:

AKTGJYKIM

I akuzuari T.L., nga babai J. dhe nëna E., e gjinisë C., i lindur me datë, në, Komuna e, me vendbanim në P....., rr.“.....”, i martuar, baba i dy fëmijëve, ka të përfunduar shkollën fillore i gjendjes së dobët ekonomike, me profesion sigurim në kompaninë private “Garda”, shqiptar, shtetas i Republikës së Kosovës, me numër personal

ËSHTË FAJTOR

Sepse me datë 26.02.2017 rreth orës 17:00 në rrugën “Shpetim Rrobaj” në Prishtinë më saktësisht tek shkolla e mesëm “Gjin Gazulli” i akuzuari T.L. ka vepruar në kundërshtim me ligjin mbi Rregullat mbi Trafikun Rrugor dhe nga pakujdesia duke menduar me mendje lehtësi se nuk do të vij deri te aksidenti, ka rrezikuar komunikacionin dhe ka vë në rrezik jetën e njerëzve me automjetin “.....” ngjyrë e gjelbër me targa që ka qenë duke e drejtuar. Për shkak të lëshimeve nga pakujdesia, duke marrë veprim të pasigurt, e godet motoçikletën e tipit “....” të

cilin e drejtonte i dëmtuari A.G. ku të njëjti i ka shkaktuar lëndime të rënda trupore me pasoja të përkohshme për shëndetin si dhe i ka shkaktuar edhe dëme materiale.

- Me çka ka kryer veprën penale Rrezikimi i trafikut publik nga neni 378 par.8 lidhur me par.6 dhe par.1 të KPRK-së.

andaj, gjykata në bazë të nenit 4, 41, 42, 49, 50, 51, 52, 73 dhe 74 të KPRK-ës dhe neneve 242 e 364 të KPP-ës, të akuzuarin T.L.:

E GJYKON

I. Me dënim me burgim në kohëzgjatje prej 6 muaj, i cili dënim nuk do të ekzekutohet nëse i akuzuari brenda periudhës verifikuese prej 1 (një) vit nuk kryen vepër tjetër penale.

II. I dëmtuari A.G. për realizimin e kërkesës pasurore juridike udhëzohet në kontest të rregullt juridiko civil.

III. Obligohet i akuzuari që të paguaj paushallin gjyqësor në shumën prej 20 € (njëzet euro), si dhe në emër të ligjit për kompensimin e viktimave shumën prej 20 € (njëzet euro), të gjitha këto në afat prej 15 ditëve pasi që ky aktgjykim të merr formën e prerë, nën kërcënimin e përmbarrimit të dhunshëm.

A R S Y E T I M

-Rrjedha e procedurës penale-

Prokuroria Themelore në Prishtinë-Departamenti i Përgjithshëm, me datë 27.05.2019, pranë kësaj gjykate, ka paraqitur aktakuzën me numër PP/II.nr.2380/2017F, kundër të akuzuarit T.L. nga Prishtina, për shkak të veprës penale rrezikim i trafikut publik nga neni 378 par.8 lidhur me par.6 dhe par.1 të KPRK-së.

Me datë 20.10.2023, pranë kësaj gjykate është mbajtur seanca e shqyrtimit fillestar në të cilën ish-in prezent prokurori i shtetit Lulzim Aliu, i akuzuari T.L. me mbrojtësin e tij av. Sh.U.si dhe i dëmtuari A.G.. Në këtë seancë prokurori i shtetit ka lexuar aktakuzën lëndore, me ç'rast i akuzuari ka deklaruar se e ka kuptuar në tërësi aktakuzën dhe veprën penale për të cilën akuzohet dhe se e pranon fajësinë për kryerjen e veprës penale e cila i vihet në barrë me ç'rast gjykata pas dëgjimit të palëve dhe në pajtim me nenin 242 të KPP-ës, ka marrë aktvendim me të cilin ka pranuar fajësinë nga ana e të akuzuarit.

-Vlerësimi i pranimit të fajësisë-

Gjykata pas mbajtjes së shqyrtimit fillestar në të cilin kanë qenë prezentë palët e lartcekura dhe pas dëgjimit të palëve ka marrë aktvendim me të cilin ka pranuar fajësinë e të akuzuarit për veprën penale për të cilën akuzohet ngase ka konstatuar se janë plotësuar gjitha kushtet ligjore për një gjë të tillë si në kuptim të nenit 242 të KPP-së dhe se pranimi i fajësisë nga ana e të akuzuarit nuk është kundërshtuar nga ana e palëve prezentë. Në këtë aspekt gjykata ka konstatuar se i akuzuari e ka kuptuar drejtë natyrën dhe pasojat e pranimit të fajësisë, se pranimi i fajësisë është bërë vullnetarisht nga ana e të akuzuarit pas konsultimit me mbrojtësin e tij, se i akuzuari nuk ka qenë i detyruar ose i shtrënguar në asnjë mënyrë që të pranojë fajësinë, se pranimi i fajësisë mbështetet në faktet e çështjes të cilat i përmban aktakuza, e po ashtu me rastin e pranimit të fajësisë nga ana e të akuzuarit gjykata gjeti se aktakuza lëndore nuk përmbajnë asnjë shkelje të qartë ligjore ose gabime faktike.

-Gjendja faktike e vërtetuar-

Gjykata nga të lartcekurat ka vendosur që të akuzuarin ta shpall fajtor për veprën penale rrezikimi i trafikut publik nga neni 378 par.8 lidhur me par.6 dhe par.1 të KPRK-së, dhe e ka gjykuar si në dispozitiv të këtij aktgjykimi, pasi që gjeti se i njëjti është penalisht përgjegjës dhe se nuk ekzistojnë rrethana të cilat e përjashtojnë përgjegjësinë penale të të akuzuarit dhe se në veprimet e të akuzuarit manifestohen të gjitha elementet subjektive dhe objektive të kësaj vepre penale.

-Rrethanat që janë marrë për bazë me rastin e shqiptimit të dënimit-

Gjykata me rastin e matjes së dënimit ka vlerësuar që të akuzuarit ti shqiptohet si në dispozitiv të këtij aktgjykimi, ngase duke i marrë parasysh të gjitha rrethanat dhe provat të cilat gjinden në shkresat e lëndës, ky dënim do të jetë i drejtë, në harmoni me peshën e veprës penale dhe përgjegjësinë penale të kryesit dhe si i tillë me këtë dënim mund të arrihen qëllimet e dënimit në kuptim të nenit 41 të KPRK-ës, gjithashtu gjykata me rastin e matjes së dënimit ka marrë për bazë edhe rrethanat që ndikojnë në llojin dhe lartësinë e dënimit duke u bazuar në nenet 73, dhe 74 të KPRK-së, ashtu që rrethanë lehtësuese për të akuzuarin ka marrë faktin se gjykata gjeti se kjo ishte hera e parë që i akuzuari kishte rënë ndesh me ligjin, i njëjti ka pranuar fajësinë për veprën penale e cila i vihet në barrë në një fazë të hershme të procedurës penale, se i njëjti është penduar dhe ka shfaqur keqardhje për veprimet e tij, ka kërkuar falje për veprimet e tij dhe se i njëjti ka premtuar se nuk do të kryej më veprë penale, është i gjendjes ekonomike të dobët, është familjarë dhe baba i dy fëmijëve, i vetmi ushqyes i familjes ndërsa si rrethanë rënduese gjykata nuk gjeti ndonjë. Gjykata konsideron se me dënimin e shqiptuar ndaj të akuzuarit mund të arrihen qëllimet e dënimit si në kuptim të nenit 41 të KPRK-ës të cilat konsistojnë në parandalimin e të

akuzuarit nga kryerja e veprave penale dhe rehabilitimin e tij, parandalimin e personave të tjerë nga kryerja e veprave penale, shprehjen e gjykimit shoqëror për veprën penale dhe ngritjen e moralit dhe forcimin e detyrimit për respektimin e ligjit.

-Vendimi për kërkesën pasurore juridike-

Sa i përket kërkesës pasurore juridike, gjykata duke u mbështetur në nenin 462 të KPP-së, të dëmtuarin A. G. për realizimin e kërkesës pasurore juridike e udhëzon në kontest të rregullt juridiko civil.

-Vendimi mbi shpenzimet e procedurës penale-

Vendimi për kompensimin e shpenzimeve të procedurës penale dhe të paushallit gjyqësor është marrë në bazë të nenit 449 par.2 pika 2.6 të KPPRK-së. Ndërsa, për shpenzimet për programin për kompensimin e viktimave të krimit është marr komfor nenit 36 par.3 nënpar.3.1 të Ligjit Nr. 08/L-109 për Kompensimin e Viktimave të Krimit.

Nga se u tha më lartë u vendos si në dispozitiv të këtij aktgjykimi

GJYKATA THEMELORE NË PRISHTINË

Departamenti i Përgjithshëm

P.nr.1764/19, me datë 27.10.2023

Gjyqtari i vetëm gjykues

Dibran Jusufi

KËSHILLË JURIDIKE: Kundër këtij aktgjykimi, ankesë mund të paraqesin personat e autorizuar brenda tridhjetë (30) ditësh, nga dita e dorëzimit të kopjes së aktgjykimit. Ankesa bëhet përmes kësaj Gjykate, për Gjykatën e Apelit në Prishtinë.